



VUITTIIGA BÁLKKAŠUMI



VILDÁ: Vilda-duo Hildá Länsman ja Viivi Maria Saarenkylä illudeaba go vuittiiga Music Moves Europe Talent Awards-nammasaš bálkkašumi.

Govven: Kim Saarinen.

Sámi duo oaččui riikkaidgaskasaš fuomášumi gilvvus mas artisttat miehta Eurohpá gilvaledje.

Hilda Länsman ja Viivi Maria Saarenkylä leaba VILDÁ, ja bearjadaga vuittiiga soai Music Moves Europe Talent Awards-nammasaš riikkaidgaskasaš musihkkabálkkašumi. Hilda Länsman ii lean

oahpis bálkkašupmái, ja manjel go lei dutkan veaháš bálkkašumi birra, ipmirdii man earenoamáš lei.

– Lean giitevaš go munno musihkka oažžu dákkár fuomášumi. Dat lei áibbas fiinnis. Mus lea maid giitevaš dovdu go mánggas leat jienastan «Public choice awards»-oasis maid ean vuoitán gal, muhto somá oaidnit ahte olbmot čuvvot ja beroštit munno musihkas, muitala Länsman.

Bovttii dovdduid

Jury gohčodii VILDÁ musihka hirmáhuhttin, earenoamážin ja lohke boktit dovdduid sis. Länsman ii lohkan iežas vuordit dan, ja sutnje lei vel eanet earenoamáš go guldalii eará artisttaid geat ledje nominerejuvvon.

– Dat lei ollu dakkár popmusihkka, ja munnje lei earenoamáš go munno lágan musihkka sáhtta doppe fuomášuvvot ja ovddastuvvot, dadjá Länsman.

Sudnuide lea movttiidahtti oažžut bálkkašumi, earenoamážit manjel earenoamáš jagi 2020. Dat lei stuora erohus 2019 rájes go soai čuojaheigga badjel 150 konsearta. Muhto Länsman illuda go lea beassan bidjat áiggi ealu luhtte finadit, lagasolbmui guin ovtastallat ja eará kreatiiva bargguid bargat.

Veahkin

Ledje 16 nominerejuvvon artistta, ja gávccii vuoti. Juohke vuoti

oažžu 10 000 euro bálkkašumi, maid EU doarju. Ulbmil dainna lea veahkehit ovdánahttit riikkaidgaskasaš karriera, ja Länsman lohka iežaska áigut árvoštallat masa áiguba geavahit vuoiitu.

– Mun jáhkán ahte dat boahtá veahkehit ollašuttit munnos earálgan prošeavttaid ja plánaid, dadjá Länsman.

Inger Kristina Gaup-Kaseka
ingerkristina@avvir.no

KÁRÁŠJOHKA		ÁLTÁ		AVVIL		DIVTASVUODNA	
Gaskavahkku	-21	Gaskavahkku	-14	Gaskavahkku	-21	Gaskavahkku	-6
Duorastat	-21	Duorastat	-15	Duorastat	-25	Duorastat	-7
GUOVDAGEAIDNU		DEATNU/OHCEJOHKA		HEAHTTÁ		JÁHKÂMÁHKKE	
Gaskavahkku	-22	Gaskavahkku	-14	Gaskavahkku	-21	Gaskavahkku	-16
Duorastat	-19	Duorastat	-14	Duorastat	-17	Duorastat	-11
PORSÁNGU		ČÁHCESUOLU		ROMSA		GÁRESAVVON	
Gaskavahkku	-14	Gaskavahkku	-7	Gaskavahkku	-7	Gaskavahkku	-18
Duorastat	-16	Duorastat	-6	Duorastat	-7	Duorastat	-23



20.01. ☾ 28.01. ○
04.02. ☾ 11.02. ●